

V E N D I M
Nr. 204, datë 26.3.1998

**PËR KOMPETENCAT, DETYRAT FUNKSIONALE DHE FINANCIMIN E PUSHTETIT
LOKAL**

Në mbështetje të ligjit nr. 7572, datë 10.6.1992 “Për organizimin dhe funksionimin e pushtetit lokal”, dhe të ligjit nr. 7776, datë 22.12.1993 “Për buxhetin lokal”, me propozimin e Ministrisë së Financave dhe Sekretariatit Shtetëror për Pushtetin Lokal, Këshilli i Ministrave

V E N D O S I :

1. Pushteti lokal është kompetent, administron dhe përgjigjet tërësisht për funksionet vijuese:
a) administrimin, mirëmbajtjen, furnizimin me materiale të konsumit të përgjithshëm, ujë, energji elektrike, ngrohje, lyerje dhe shërbime të tjera të këtij karakteri për institucionet që përfshihen në aneksin nr.1, që i bashkëngjitet këtij vendimi;

b) kryerjen dhe administrimin e shërbimeve sipas aneksit nr.2, që i bashkëngjitet këtij vendimi.

2. Detyrat dhe funksionet e pushtetit lokal të përcaktuara në pikën 1 të këtij vendimi, ushtrohen dhe realizohen nëpërmjet buxhetit të pavarur të rrethit, bashkisë e komunës. Ky buxhet hartohet në përputhje me udhëzimet e lëshuara nga Ministria e Financave dhe Sekretariatit Shtetëror për Pushtetin Lokal dhe përmban:

- shpenzimet për ushtrimin dhe realizimin e detyrave dhe funksioneve të mësipërme;
- të ardhurat, të cilat me ligj u takojnë organeve të pushtetit lokal;
- diferencën ndërmjet shpenzimeve dhe të ardhurave të buxhetit lokal të pavarur, që financohet nga blloku i ndihmës së pakthyeshme që i jep pushteti qendror secilit organ të pushtetit lokal.

3. Ndihma e pakthyeshme e pushtetit qendror jepet si një shumë totale për çdo komunë, bashki e rreth dhe është pjesë përbërëse e shpenzimeve të buxhetit qendror, që miratohet nga Kuvendi Popullor.

Ajo ndahet në dy grupe:

a) për investime (rikonstruktive e mirëmbajtje); dhe

b) shpenzime operative.

Pjesa e ndihmës për investime zërthehet në objektet në përputhje me politikën e ministrive përkatëse për rrjetin institucional. Për shpenzimet operative, këshillat lokale miratojnë prioritetet dhe strukturat e përdorimit të burimeve financiare në dispozicion si nga burimet lokale, ashtu edhe nga buxheti qendror.

Ndihma e pakthyeshme e pushtetit qendror do të jetë e ndryshme për çdo komunë, bashki e rreth, në varësi nga gjendja dhe mundësitë e përmirësimit të rrjetit të institucioneve dhe infrastrukturës lokale.

4. Organet e pushtetit lokal ushtrojnë detyra dhe funksione të deleguara nga pushteti qendror, brenda normave ligjore përkatëse dhe buxhetit të miratuar për secilin funksion, si vijon:

a) Bashkitë dhe komunat:

kryerjen e pagesave për pagat, shtesat mbi pagë dhe përfitimet e tjera të drejtuesve dhe punonjësve të institucioneve në vartësi të tyre në masën e përcaktuar me akte ligjore e nënligjore dhe brenda numrit të punonjësve në organikën e miratuar për çdo vit;

pagesën e ndihmës ekonomike dhe të përfitimeve të tjera të këtij karakteri në kuadrin e politikës sociale për banorët e regjistruar zyrtarisht në territorin e tyre.

- administrimin e procesit të privatizimit dhe likuidimit të ndërmarrjeve shtetërore lokale.

b) Rrethet:

kryerjen e pagesave për pagat, shtesat mbi pagë dhe përfitimet e tjera të drejtuesve dhe punonjësve të institucioneve në vartësi të tyre në masën e përcaktuar me akte ligjore e nënligjore dhe brenda numrit të punonjësve në organikën e miratuar për çdo vit;

- administrimin e procesit të privatizimit dhe likuidimit të ndërmarrjeve shtetërore lokale.

5. Detyrat dhe funksionet e deleguara sipas pikës 4 të këtij vendimi ushtrohen dhe realizohen nëpërmjet buxhetit të kushtëzuar të rrethit, bashkisë dhe komunës. Ky buxhet është pjesë përbërëse e buxhetit qendror, që administrohet nga organet e pushtetit lokal. Organet e pushtetit lokal përgjigjen për administrimin e mirë të kësaj pjese të buxhetit dhe nuk kanë të drejtë ta përdorin për qëllime të tjera qofshin ato detyra dhe funksione të tyre të deleguara.

6. Organet e pushtetit lokal janë investitorë për projekte që financohen me burime të huaja, kur caktohen në marrëveshjet përkatëse ose kur ky funksion u delegohet nga institucionet qendrore, nga njësitë e ngarkuara për zbatimin e projekteve, si dhe në marrëveshjet e veçanta që lidhen ndërmjet secilit organ të pushtetit lokal dhe njësisë përkatëse të zbatimit të projektit.

7. Ministria e Financave dhe ministrinë e institucionet e tjera qendrore që mbulojnë funksione të ngjashme me ato të organeve të pushtetit lokal ose u delegojnë funksione këtyre të fundit, me konsulencën e Sekretariatit Shtetëror për Pushtetin Lokal, ngarkohen të përgatitin udhëzimet përkatëse në zbatim të këtij vendimi, brenda muajit prill të vitit 1998.

Ky vendim hyn në fuqi menjëherë.

KRYEMINISTRI
Fatos Nano

ANEKSI 1

I. Lista e institucioneve në vartësi të bashkive/komunave

1. Organet ekzekutive dhe legjislative

Zyrat e organeve të zgjedhura dhe ekzekutive

2. Arsimi:

- a) kopshtet e fëmijëve,
- b) shkollat fillore dhe tetëvjeçare,
- c) shkollat e mesme të përgjithshme,
- d) konviktet e shkollave të mesme,
- e) bazat prodhuese të shkollave të mesme të përgjithshme,
- f) qendrat kulturore të fëmijëve.

3. Shëndetësia:

- a) çerdhet ,
- b) ambulancat dhe klinikat e shërbimit ambulator,
- c) klinikat dentare,
- d) shërbimi DDD.

4. Kultura:

- a) qendra kulturore, ku bëjnë pjesë,
- b) shtëpitë ose pallatet e kulturës,
- c) bibliotekat lokale,
- d) galeritë lokale të artit,
- e) muzetë lokale,
- f) teatrot e kukullave,
- b) kinematë shtetërore,
- c) teatrot lokale,
- d) mjediset sportive lokale ,
- e) përsëritësit televizivë.

5. Ndërtimi, banimi dhe rregullimi i mjedisit:

- a) Vendstrehimet e popullsisë (nën banesë apo të groposura)
- b) Monumentet, lapidarët etj.

II. Lista e institucioneve në vartësi të rretheve

1. Organet ekzekutive dhe legjislative:

- a) zyrat e organeve të zgjedhura dhe ekzekutive lokale;
- b) vendkomandat për kohë lufte (mbi e nëntokësore).

2. Arsimi

a) qendrat ekonomike të arsimit (sektori ekonomik i drejtorisë arsimore)

ANEKSI 2

I. Lista e shërbimeve në kompetencë të bashkisë/komunës:

1. Organet ekzekutive dhe legjislative

Është investitor për ndërtimin e zyrave dhe mjediseve të punës për organet e zgjedhura në organet ekzekutive.

2. Bujqësia, ushqimi dhe tregtia

Administrimi i kullotave të komunave

Investimet dhe administrimi i rrjetit ujitës, në rastet kur burimet ujore janë brenda/afër fshatrave/ qyteteve të komunës/bashkisë dhe rrjeti i shërben vetëm një komunë/bashkie.

Shërbimi veterinar për nevojat e popullsisë dhe kontrolli veterinar në thertore, magazinat frigoriferike, tregun e kafshëve dhe objekte të tjera të kësaj natyre.

Shërbimet e tjera veterinare që kanë të bëjnë me kontrollin e sëmundjeve (lista B, vaksinime, gjurmime, dehelmizime etj.) dhe kontrolli i tregut të mishit dhe bulmetrave.

Lejimi dhe kontrolli i prodhimit sezonal në kushtet e shtëpisë dhe në sasi të kufizuara të pijeve alkoolike për nevojat vetjake.

Ndërtimi, mirëmbajtja dhe administrimi i kanaleve kulluese dhe ujitëse të treta, në rastet kur rrjeti i tyre është i ndarë nga sistemi në shkallë rrethi dhe është brenda territorit të komunës.

Administrimi i pyjeve të dhëna nga Ministria e Bujqësisë, Drejtoria e Përgjithshme e Pyjeve në shfrytëzim komunave për banorët e vet.

Organizimi, administrimi dhe kontrolli i tregut të produkteve bujqësore e blegtorale, si dhe i tregtisë ambulante të mallrave industriale.

3. Ndërtimi, banimi dhe rregullimi i mjedisit

Ushtrimi i së drejtës së pronësisë mbi banesat e paprivatizuara brenda territorit të bashkisë/komunës.

Shërbimet publike të mëposhtme:

a) mirëmbajtja e lulishteve, trotuareve dhe parqeve brenda/ në periferi të qytetit/fshatit;

b) sistemi i kanalizimeve, banjot publike, pastrimi, grumbullimi dhe përpunimi i plehrave;

c) shërbimi i funeralit, mirëmbajtja e varrezave publike dhe varrezave të dëshmorëve, monumentet publike, lapidarët etj;

d) investimet dhe administrimi i ujësjellësve, puseve, çezmave dhe burimeve të ujit të pijshëm që i shërbejnë një komunë/bashkie;

e) dekorimi dhe ndriçimi i rrugëve të bashkive/komunave;

f) organizimi dhe realizimi i punëve publike.

4. Transporti dhe komunikacioni

Shërbimi i transportit publik urban dhe taksive urbane.

Ndërtimi dhe mirëmbajtja e rrjetit lokal që lidh qendrën e komunës/bashkisë dhe fshatrat/lagjet e qytetit, si dhe rrugët brenda fshatit, lagjeve të komunës/bashkisë.

5. Kultura, sporti

Është investitor për ndërtimin e institucioneve dhe monumenteve të tjera të kulturës, dhe sporteve në vartësi.

Zhvillimin e veprimtarive masive kulturore, sportive dhe rinore në shkallë lokale.

II. Lista e shërbimeve në kompetencë të rrethit

1. Organet ekzekutive dhe legjislative

Është investitor për ndërtimin dhe mirëmbajtjen e zyrave dhe mjediseve të punës për organet e zgjedhura dhe organet ekzekutive.

2. Arsimi

Furnizimi me materiale mësimore, pajisje shkollore dhe çdo lloj furnizimi tjetër që lidhet me zhvillimin normal të mësimit me përjashtim të pajisjeve laboratorike dhe teksteve shkollore.

Transporti i arsimtarëve dhe nxënësve nga vendbanimet në shkollën ku bëjnë mësim.

Në zbatim të pikës 6 të këtij vendimi, është investitor për meremetimin dhe rikonstruksionin e shkollave dhe institucioneve të tjera arsimore në vartësi të pushtetit lokal dhe pajisjen për

funksionimin normal të tyre.

3. Shëndetësia

Mbikëqyrja e shërbimit shëndetësor në shkallë rrethi.

4. Transporti dhe komunikacioni

Transporti publik interurban dhe transporti i mallrave brenda rrethit.

Është investitor për ndërtimin dhe mirëmbajtjen e rrjetit rrugor lokal që lidh qendrat e komunave në gjithë rrethin dhe qendrën e komunës me qendrën e rrethit, por që nuk përfshihen në rrjetin e rrugëve kombëtare.

5. Bujqësia

Është investitor për ndërtimin e rrjetit kullues e ujitës, që i shërben më shumë se një komune a bashkie dhe që nuk përfshihet në rrjetin kombëtar të përcaktuar nga Ministria e Bujqësisë dhe Ushqimit apo në programe ujitjeje dhe kullimi me karakter kombëtar.

6. Ndërtimi, banimi dhe rregullimi i mjediseve

Është investitor dhe administrator i ujësjellësave që i shërbejnë më shumë se një komune/bashkie dhe që nuk klasifikohen nga Ministria e Punëve Publike dhe Transportit si objekte me karakter kombëtar.